

Namminersorlutik Oqartussat ingerlatseqatigiiffiutaanni aamma tamakku ataanni ingerlatseqatigiiffinni siulersuisuni ilaasortat akissarsiaqartinneqalernissaannut politikkip kaajallaasitanngortinneratigut pisortatigoortunngortinneqarnissaa pillugu Inatsisartut aalajangiiffigisassaattut siunnersuut.

(Naalakkersuisut Siulittaasuat)

Saqqummiussissut

(Naalakkersuisut Siulittaasuat)

Siullermeerneqarnera

Naalakkersuisut akissarsiaqartitsinermut politikkiannik pisortatigoortunngortitsinissaa pillugu aalajangiiffigisassatut siunnersuummik saqqummiussaaq pillugu Naalakkersuisut qujarusupput. Taamaalillutik Naalakkersuisut akissarsiaqartitsinissami immikkoortut pingaarnerit aamma Naalakkersuisut sulineranni akissarsiaqartitsinermut politikkip qanoq atornerarnera pillugit ilisimatitsinissaminnut pissutissaqalerput.

Taamatuttaaq akissarsiaqartitsineq pillugu politiki atuuttoq ilaatigut akissarsiassanik aalajangersaanerit sulineranut imminnut ataqatigiilluinnarnissaannut siunnersuutitaqarpoq. Aammattaaq ingerlatseqatigiiffinni siulersuisut ataatsimut isigalugit akisussaaffimmut, takunnissinnaanermut sulinernullu naapertuunnerpaanik akissarsiaqartinneqassasut siunnersuutigineqarpoq.

UKA2020 imm. 197 ”*Namminersorlutik Oqartussat ingerlatseqatigiiffiutaanni aamma tamakku ataanni ingerlatseqatigiiffinni siulersuisuni ilaasortat akissarsiaqartinneqalernissaannut politikkip kaajallaasitanngortinneratigut pisortatigoortunngortinneqarnissaa pillugu Inatsisartut aalajangiiffigisassaattut siunnersuut*”-ip akuerineqarneratigut Naalakkersuisut aningaasarsianut politikkiannik nutarterineq kaajallaasitanngortitsinikkut pisortatigoortunngortinneqassaaq kiisalu Naalakkersuisut Namminersorlutik Oqartussat ingerlatseqatigiiffiutaanni akissarsiat pillugit aalajangiinnissamat tunngavissaqalissallutik.

UKA2020 imm. 197-ip suliarineqarneranut atatillugu erseqqissaatigissavara akissarsiaqartitsinermut politikkip malinneqarnissaata saniatigut Naalakkersuisut Namminersorlutik Oqartussat ingerlatseqatigiiffiutaanni siulersuisunut akissarsiat pillugit aalajangiisarnermi ammasuunissamat ersarissuunissamullu suleqataanissaat.

Siullermik akissarsiat pillugit tamanit pissarsiarineqarsinnaasumik politikeqarpoq aamma ingerlatseqatigiiffinni akissarsianut atuuttunut takussutissat tamanit pissarsiarineqarsinnaapput.

Aappassaattut Naalakkersuisut ataatsimiinnerannit imaqarnilianik taakku nittartagaatigut tamanut saqqummiisoqartarpoq, tassunga ilanngullugit Namminersorlutik Oqartussat aktianik ingerlatseqatigiiffiutaanni ataatsimeersuarnissat sioqqullugit Naalakkersuisut aalajangernerat. Naalakkersuisut aalajangernerannik tamanut saqqummiussinerit tamanut ammanerulernerit assersuutaavoq, tassani pisortat suliarinnittarnerat pillugu inatsimmi Naalakkersuisut ataatsimiinnerannit imaqarnilianik takunnissinnaatitaaneq toqqaannartumik ilaatinneqanngimmat.

Pingajussaattut Namminersorlutik Oqartussat aktianik ingerlatseqatigiiffiutaanni ataatsimeersuarnernut tusagassiortut iserlutik tusarnaarsinnaatitaasernerat nalinginnaasuvoq.

Kiisalu Namminersorlutik Oqartussat aktianik ingerlatseqatigiiffiutaanni Ukiumoortumik naatsorsuutit pillugit inatsimmi ingerlatseqatigiiffimmi siulersuisunut aningaasartuutit paasisutissiissutigineqartarnissaat piumasaqaataasoq erseqqissaatigineqassaaq.

Isummernissamat tunngavissiaq manna akuerineqarpat Naalakkersuisut kingusinnerpaamik ukiup naanerani politikkit Naalakkersuisut Namminersorlutik Oqartussat ingerlatseqatigiiffiutaanni akissarsiaqartitsinerit politikkimut tunngasut kaajallaasitanngortillugit pisortatigoortunngortissavaat. Kaajallaasit taakku aallaavigalugit Naalakkersuisut Namminersorlutik Oqartussat ingerlatseqatigiiffiutaanni ataasiakkaani akissarsianik aalajangersaanissamat nassuiaat naammassissavaat. Nassuiaat 2020-ip naanerani naammassissangatinneqarpoq.

Naalakkersuisut taamatut oqaaseqarlutik siunnersuut akuerineqassasoq inassutigaa.